

Die Heilung eines Gelähmten

De Mäschter zog im Land erum
un kam so no Kapernaum.
Erumgerennt sin do die Leit
un iwwerall han se vebreit:

„Do driwwe in de Friehofstroß
beim Bawett, do is heit was los.
Do isser, lang hann mer gewaat.
Kummen all, heern, was er saat!“

Do sinn die Leit, ob alt, ob jung,
in die Friedhofstroß gesprung.
Un wie's Gewitter war das Haus
vum Bawett voll, selbscht 's Trottoir drauß
war voll mit Leit - kää bissje Platz.
Do hebt er a zum erschte Satz:

„Schää, dass ehr do sinn“, wollt er sage.
Do sinn vier kumm mit äner Trage.
Uff dere hat äner gelä,
der konnt sei Bää nimmi beweh.

Der war, vor Johre siwwe, acht
's war um *die* Zeit, an Fassenacht,
me'm Esel in die Stadt geritt
un hat sich mit dem Vieh gestritt.

Das hat ne dann korz abgeschmiss,
un wie das so bei Esel is,
noch nogetreet. Wie unveschämt!
Un seitdem is der Mann gelähmt.

Doch denne zum Jesus zu bringe,
wollt de Träger net gelinge.
De Weg war vun de Leit blockiert.
Do sinn die Männer ungeniert
em Bawett uff sei Dach gekrabbelt,
glei druff hann Ziechele gerabbelt.

E Loch im Dach, zwä uff zwä Meter,
un knapp e Vertelstinnche später
kam der arm gelähmte Mann
unne dann beim Jesus an.
Weil, sie hann ne abgesält
un hoffen, der werd heit gehält.

De Jesus sagt: „Jetzt sin mol still,
weil ich was vezehle will!
Ich sieh grad, groß is euer Glaube.
Drum du ich mer jetzt mol erlaube,
die Sünde vun dem arme Lahme
zu erlasse, in Gottes Name.
Un jetzt stei uff, 's is gar net schwer,
un laaf e bissje hi un her!“

Ehr wärn's net glaawe, 's hat geklappt,
der Mann steit uff, streckt sich un tappt
im Bawett seiner Stubb erum,
bahnt sich e Weg durchs Publikum
un macht sich, laafe kann er gut,
uffs Flierche, wo er wohne duht.

Un hinner'm in de Friedhofstroß
beim Bawett war die Hölle los!

De Esel bleibt uff jede Fall
bis uff weiteres im Stall.

Des war die Story vun dem Lahmen. Amen!

... und das Lied dazu

Wo, wo, wo, wo sin dei Hose?

(Melodie: Rot, rot, rot, rot sind die Rosen)

Seit Johre konnt der arme Mann nimmi geh,
nimmi grad sich mache un a nimmi steh.
Dann kommt de Jesus, seit der Stund
do is der arme Mann gesund.
Er nemmt ne in de Arm un saat zu ihm:

Refrain:

Wo, wo, wo, wo sin dei Hose?
Du se a, kannscht wieder laafe.
Zieh a dei Wams owwedruff,
un dann geh häm uffs Flierche nuff!
Un jetzt stei endlich uff!

Wo, wo, wo, wo sin mei Hose?
Ich zieh se a, kann wieder laafe.
Dann awwer schnell nix wie häm,
ausreiße kännt ich jetzt Bääm,
Fraa, nemm dich jo in Acht!